

**Kalaallit Nunaanni aalisarfiusup iluani aalisartitseqatigiiffiup aningaasaataasa ikinnerpaamik inunnit aalajangersimasunit pigineqarnissaannik allaqqasoq assigalugu ingerlatseqatigiiffiup piginnittuisa agguagarsisarnissaasa aalisarnermut inatsimmi allaqqalersinnaanerata kingunerisinnaasai pillugit kingusinnerpaamik UKA 2017-imi nalunaarummik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Hans Enoksen, Partii Naleraq)

### **Akissuteqaat**

(Inuussutissarsiornermut, Suliffeqarnermut, Niuernermit Nunanullu Allanut Naalakkersuisoq)

### **Siullermeerinnineq**

Aalisarnej pillugu Inatsisartut inatsisaanni kapitali 4 naapertorlugu suliffeqarfinit inuussutissarsiutigalugu aalisarsinnaasunit agguagarsianik akiliinermi assigiimmik agguagarsisitsisarnissaq pillugu piumasaqaammik atuutilersitsinissap kingunissaanik nassuiaalluni, nassuiaammik saqqummiussinissaq pillugu Inatsisartut aalajangiiffisassaattut siunnersuut saqqummiunneqartoq pillugu siunnersuuteqartoq Naalakkersuisut sinnerlugit aallaqqaasiullugu qutsavigissavara.

Agguarsianik naleqqiussilluni agguasaarneq pillugu piumasaqaat sunik ajornartorsiutitaqarnerisooq imaluunniit qanoq ililluni Kalaallit Nunaannut isertitsissutaanerussanersoq tunngavilersuutini ersarissumik allaqqangilaq.

Suliffeqarfiit aningaasaliisartut suliffeqarfiit pillugit inatsimmi ataatsimut isigalugu killilersuiffigineqarput. Naalakkersuisut eqqaasitsissutigissavaat Inatsisartut upernaakkut ataatsimiinnermi imm. 103 pillugu aalajangiisut suliffeqarfiit pillugit inatsit nutartigaq Kalaallit Nunaannut atuutilersinneqassasoq. Siulersuisut imaluunniit aningaasaliissutinik piginnittut suliffeqarfimmi pineqartumi sinneqartoortunit agguagarsiassanik agguasaarneq taakkulu annertussusissaat pillugit ataatsimeersuarnermi inassuteqaateqartarput. Piginnittut isumaqatigiissutaanni allanik allaqqasoqangippat imaluunniit aktiaatit suuneri assigiinngisitaartuunngippata, suliffeqarfimmut aningaasaliissutinik pigisat annertussusaat tunngavigalugit agguagarsiassat akiliisoqartassaaq. Agguagarsiassat tunniunneqartut tigungerini akileraaruserneqassapput.

Suliffeqarfimmi piginnittut sinneqartoortut ilaannik agguagarsititsinissamik aalajangiisinnaapput. Aatsaat suliffeqarfiup illersorneqarsinnaasumik ingerlanneqarnissaanut aningaasat sinneruttut naammappata agguagarsisitsisoqarsinnaavoq.

Agguarsiassanik nalinginnaasumit allaanerumik agguaassineq aatsaat isumaqataassutaasimappat aktiaatillu suuneri assigiinngisitaarpata pisinnaavoq. Piginnittut namminneq tamanna isumaqatigiissutigisimassavaat siumullu isumaqatigiissutaasimassalluni. Agguagarsiassanik nalinginnaasumit allaanerumik agguaassinissaq siulersuisut nammineerlutik siunnersuutigisinnaanngilaat.

Suliffeqarfimmi agguagarsiassanik nalinginnaasumit allaanerusumik agguasinissamik piginnittut isumaqatigiissuteqarsimasinnaanerannut pissutaasut amerlasinnaapput. Suliffeqarfinnik piginnittut namminneq iliuseqarsinnaanerisa killilernissaa Naalakkersuisut kissaatiginngilaat, aamma tamanna agguagarsiata akileraaruserneqartarnerannut pingaaruteqanngimmat.

Kalaallit Nunaata aalisarnermi oqartussaaffiani inuussutissarsiutigalugu aalisalersinnaanermut piumasaqaatit arlallit aalisarneq pillugu Inatsisartut inatsisaanni kapitali 4-mi allaqqapput. § 6 malillugu Kalaallit Nunaanni inuussutissarsiutigalugu aalisalersinnaanermut aalajangersimasunik pingaarnertut piumasaqaataavoq inuit Kalaallit Nunaannut aalajangersimasumik atassuteqassasut akileraartussaataitaallutillu. Aalisarneq piginneqatigiiffimmit ingerlanneqarpat aningaasaliissutit inunnit piumasaqaatinik qulaaniittunik eqqortitsisunit pigineqassasut piumasaqaataavoq.

Kalaallit Nunaata annertunerpaamik isertitaqarnissaa qulakkeerniarlugu piumasaqaatit taakku ilanngunneqarput.

Suliffeqarfiit assigiinngisitaanngitsunik aktiaateqarfiusut kisimik inuussutissarsiutigalugu aalisarsinnaanerannik piumasaqaateqartoqarnissaa Kalaallit Nunaata isertitaqarnerulerneranik kinguneqarnaviannngilaq. Taamatut piumasaqaateqartoqassappat suliffeqarfiit nutaanik aningaasaliisussarsiorsinnaanerata imaluunniit kinguaariit nikissinnaanerata il.il. ajornakusoortinneqalertussaavoq.

Inuussutissarsiutigalugu aalisarsinnaanermut piumasaqaatinik nutaanik atuutilersitsineq pinngitsaaliissummik taarsiissutitalimmik pigisanik piginnikkunnaarsitsinertut isigineqarsinnaavoq, tamassumalu kingunerisaanik taamaallaat aalisalersunut nutaanut piumasaqaateqartoqarsinnaassalluni. Suliffeqarfinnut nalinginnaasumit allaanerusumik agguagarsisitsinissamik isumaqatigiissuteqarfiusimasunut taamatut piumasaqaateqartoqarnissaata aamma kingunerisinnaavaa, aktiaatit assigiinngisitaarnerannik allanngortitsinissamik pisussaaffiup tunniussiinnarnertut akileraartarnermi isigineqarsinnaanera, tamassumalu kinguneranik isertitsissutaanngitsumik aktiaatinik tunisinertut aktiaateqartut akileraartinneqartussaassallutik.

Qulaani taaneqartut tunngavigalugit Naalakkersuisut naliliipput nassuiaammi assinganik inerniliisoqassasoq, taamaammallu siunnersuutip akuerineqannginnissaa innersuussutigalugu.